

Patué de Trétorein Le recrutémeïn, on yadzo

Tieu r'an passau, on ne desavé pa ala eu recrutémeïn, on desavé ala teryé eu sâ (sort). Sè recrutémeïn, l'aré pa kemeïn vora de foryé, mé d'enton. On mâ devan dza, on allavé à l'écoula deu nué après l'ou travail. Lé ke adon, on markavé lé noté, lé buené kemeïn lou krouyé, dein le livré de sèrvîçe. A Trétorein, la ke muena balliévé na prima à tieu ke l'aran bin timpon, rein de rein. De tieu eintie, l'ayeindavé todzo preu.

Et de dré ke lou mémo coudion enco tan fairé lou malin.

On partessavé teryé eu sâ le bon matin avué on drapau, on tambou et n'armonika. Sè drapau l'aré todzo misau. Bin soyeïn, l'allavé à on prié de fou. Sè ardzeïn l'aré po payé l'armonika, le tambou et le dina sè dzo eintie.

Après avâ passau l'exameïn po l'instrukchon, on alavé passa la vesita po sava s'on aré seuda ou bin reformau. Soveïn, l'ayavé prèske atan de reformau ke de seuda. Parai ke adon, lou medecin l'aran pa tan monieïn. De tire après ceïn l'aré d'ala vito atzéta on monstre bokié po bueta eu tzapé. On avé once de la touche avué ceïn. Après le dina, on partessavé contre l'otau, drapau, tambou et armonika ein téta. Arevau eu veladzo, l'aré d'ala dein teté lé pinté, baré, dantié, tzanta, utchié et fairé le mè de brui possible. L'are rein fallu venin no trepa su lou pia, parce k'on aré tui l'on po l'atro. D'ivè le tâ (tard), l'aré d'ala trova de lé tzou-pinné po bin tzavuenâ la fêta.

Le demeindze d'après, on alavé se promena yau ke sâ. On alavé amon pe la Voude Lié, ou amon à Modzeïn ou bin bâ eu Bovéré, dantié et fairé lou fou tan kek liè tâ de nué. Vora, lou recru ne van pas mé à l'écoula devan le recrutémeïn, passon min d'exameïn. On ne sâ pa pié se l'ayeind'a ke sâvon liéré ou écrire on bocon de léttra. Ne puon pas mé bueta on bokié, parce ke ne porton pa mé min de tzané. Bueton pié dé boné ein papa (papier). Rein, deu treïn de kametran.

On é contreïn de dré ke dein noutron teïn, lou dzouvuena se demoravan bin mio ke vora. Lé le ka de dré ke tro to tzandzé. N'eïn preu brameïn laze de vè ceïn ke l'ayaré mé de nové dein nâ çinkantaina d'an.

I.R.